

TITSONGAHATI

 [Makwerhu Neville a tivisa Makwerhu Branham a vanhwini—Muhleri.] Leswi swi tsema nhlana. Ndzi pfumela leswaku ndzi nga tivisa switiviso lahawani, “Ku na tinyiko tin’wana: kuva ndzi ehleketa hi swin’wana swo kotisa sweswo.” [Makwerhu Branham na nhlengeletano va hleka.]

² Hakunene ndza tiphina kuva ni ri lahawani nkarhi hinkwawo. Rendzo ra hina ri le kusuhi niku fika emakumu sweswi, ra kuva hina hi tshama na n’wina. Hikuva, hi na nhlengeletano yin’wana leyi yi taka eChicago, nakona ndzi fanele ku—ku teka ndyangu ndzi wu tlherisela endzhaku eArizona ku nga ri khale ngopfu. Nakona a va se vhaka ku vhaka ka ximumu, nakona ndzi fanele ku va fambisa nyana ndzi va yisa kun’wana, hi masiku mantsongo. Kutani hakanyingi ndzi tava ndzi ri ekule eka rin’wana, siku rin’wana, rin’wana ra Tinsota, kutani vhiki leri ri landzelaka ndzi tava ndzi ri karhi ndzi sungula a Chicago. Kutani ndzi ta tlhela ndzi fanela ku vuya, hi Muvhulu, kutani ndzi ta va teka ndzi va yisa eArizona.

³ Kutani sweswi ndza swivenga ku nghena hi Sonto ni mixo, ni teka nkarhi walowo laha un’wana na un’wana a nga eku kokeni ka moyo. Vusiku bya Sonto, mi tshama mi karhele niku hlakala, hi vusiku bya Sonto; kutani ndzi ta tlherisela xikhongelo xa Sonto ni vusiku eka mufundhisi wa hina, ya lawa—ya lawa i maendalelo yo biha. Kambe ndza swi venga ku swi endla, nakona hambi swi ri tano hi vusiku bya Sonto ndzi tava na yona, vusiku bya Sonto, ku va na nhlengeletano hi vusiku bya Sonto, swingaleswi ndzi khomeleta vanhu nkarhi wo leha. Votala va vona va ta lahawani va ri karhi va huma edzongeni na—na le n’walungwini, nakona va na, oho, minkarhi yin’wana va chayela nhlikanhi na vusiku, ntsena ku ta fika laha eka xikhongelo xin’we ntsena, kutani va tlhelela endzhaku. Kutani xexo hi xona xivango xa kuva ndzi ringeta ku yi endla hi Sonto na mixo, loko ndzi ta, swi tava nyika nkarhi wo tlhelela endzhaku.

⁴ Votshembheka, vaendlia va ripfumelo, ndzi va amukela njhani! Va chayela eka gamboko, na mpfula, na hinkwaswo, leswaku va ta fika lahawani, va tsemekanya tiko, madzana ya timayile, leswaku va ta eka xikhongelo nyana xin’we. Swingaleswi swi ndzi endla leswaku ndzi titwa ndzi khensa swinene Xikwembu, na le ka vanhu lava, eka ku seketela ka vona loku—luku kulu, eka leswi ndzi ringetaka ku swi vula, eka vanhu, leswaku i Ntiyiso.

⁵ Sweswi, ndza pfumela leswaku lowu i Ntiyiso, ndzi... hi mibilu ya mina hinkwayo. Loko kuri na swin’wana swo

hambana, leswi a ndzi ehleketa leswaku swa antswa, ndzi—ndzi nga ha sungula hi kuya hakunene... Ndzi ngaka ndzi nga kombeli munhu leswaku a ya kun'wana laha ndzi nga sungulangiki ndzi ya kusungula, ku ya kuma leswaku ku kahle kumbe a ku kahle. Ndzi ngaka ndzi nga kombeli munhu ku—ku tlhava goza, eka Xikwembu, laha ndzi nga swi endlangiki niku tiva leswaku i Ntiyiso. Xosungula, swiboha kuva kuri Rito ra Hosi, swingaleswi ndzi boheka ku tlhava goza ndzi ya vona loko kuri swona. Kutani loko kuri swona, kutani ndzi nga ha ku, "Tanani hi ndlela *leyi*." Wa vona, swi endla ndlela.

⁶ Kutani, sweswi, ndzi ehleketa leswaku muministara un'wana na un'wana u fanele ku swi endla sweswo, u fanele ku sungula a ya, yena hi yexe. U fanele ku va murhangeri, murhangeri wa vanhu, ku ngari ku vulavula swin'wana leswi a nga taka a nga tlhandleki voko eka swona, hi yexe. Hi fanele ku ya kwalahaya, varhangeri va vanhu.

⁷ Mixo lowu, ndzi na maendlelo yan'wana lawa ya nga twisisikiki, ntokoto lowu wu hambeneke lahawani a phulphitini. Nakona walowo i ku, hikwalaho ka xiphemu xo hetelela xa Hungu, a ndzi le ku kunguhateni ku swivula hi ndlela ya ley. Wa vona? Kambe ndzi pfumela leswaku khale xi vuriwile, nakona lahaya ku hava nchumu lowu ndzi nga wu vulaka ha swona sweswi. Kambe ndzi kumeka ekaza, ndzi dyondza ha swona.

⁸ Nakona hi vile na ku hlanganyela nyana kun'we na ndyangu namuntlha, ka buti wa mina na vona. Manana u fambile. Nakona a hi toloverile ku hlanganelu endlwini ya yena, nakona sweswi hi ya ehenhla a Delores'. Hi vile na nkarhi wa kahle kwalahaya endzhengha lowu, a hi ri karhi hi vulavula, na Teddy a ri kona. Hi yimbelele tinsimu tin'wana, hi chayisa na tinsimu tin'wana na swin'wana.

⁹ Sweswi ndza ehleketa, kumbe mixo wa Sonto lowu wu taka, loko Hosi yi swi rhandza, loko hi leswaku Makwerhu Neville a ngevi na mhaka, sweswi ndzi ta tsakela kuva na xikhongelo xo horisa vavabyi, ntsena ku xi nyiketela eka ku hanyisa vavabyi ntsena. Kutani ndza—kutani ndza ehleketa, na Hungu ra mixo lowu, hi ndlela ley. Hosi a swi tikomba yi ndzi rhangerisa xiswona ku Ri tiyisa, ku Ri humesa, ri fanele ri ri ra muxaka wa ku hi tiyisa nyana swintsongo, ma swi vona, ku—ku—ku ta pfumela hakunene. Ha—ha tlanga, nakona hi—hi ehleketa swilo swo hambana ni ku vulavula hi swona. Kambe loko swi ta eka ku kombisiwa, sweswo hi swin'wana swo hambana. Tani hi...

¹⁰ Un'wana a ri eku ndzi byeleni, ndzi pfumela leswaku i buti wa mina loyi a nga endzhaku lahaya, a ri eku vuleni ka ka—ka xitorhi nyana namuntlha, hi wanuna un'wana, wa—wa muministara na... un'wana wa, un'wana wa tihlengeletano ta yena. Kutani a ku a nga ha khunguluxa tsandza.

A ku, "Mufundhisi, hakunene, Hosi yi na wena."

A ku, "Ndzi nga wu bebula tsandza a nhlanini wa mina, loko ndzi famba ndzi tsemekanya."

"Hakunene, Hosi yi na wena." Nakona u fambile a ya swi endla.

¹¹ A ku, "Ndzi nga ha wu rhwala tsandza, kutani ndzi chovha na wilibara, hi nkarhi wu ri wun'we."

¹² "Hakunene, Mufundhisi, Hosi yi na wena. Ripfumelo ra wena ri nga ha endla hinkwaswo."

¹³ A ku, "Ndzi nga ha ku layicha eka wilibara, ndzi tlhela ndzi rhwala tsandza."

A ku, "Sweswi yima nyana!" Wa vona?

¹⁴ Swa hambana loko u wu katsa na wona, hi wexe. Wa vona? Sweswi, leswaku, swi na matimba ya kahle eka hina loko hi swivula lahwani, "Amen." Swi na matimba ya kahle eka hina ku swivula, "Ndzi pfumela leswaku sweswo swi ntiyiso." Kambe swi veki eka ku teka goza. U fanele ku swi veka eka ku teka goza.

¹⁵ Tani hilaha ndzi tiseke xitatimente xexo emixweni lowu, vanhu a va pavalarile eka ndzhuti wa Petro, a va kalanga va kombela hambi kuri ku kombela xikhongelo.

¹⁶ Ndzi ye eka makaya yo tala, ku ya swi vona leswi. Ndzi khongela ndzi nga si ya, nakona ntsena ndzi ya kwalahaya na ntoto, nakona ndzi nga khongeleli hambi kuri ku khongelela vanhu, kutani ndzi huma nakona a va va vahanyisiwile. Wa vona? Wa vona? Hi swona sweswo. Ndzi swi vone swi endliwa minkarhi yo tala! Wa vona? U fanele u va na kun'wana laha u nga ta vekela ripfumelo ra wena kona. Wa vona? U fanele ku swi pfumela. Nakona ndza pfumela leswaku awara yi le ku tshuneleleni, nakona hi ya ley.

¹⁷ Nakona ndza switekela enhlokweni leswaku lexi a hi xikhongelo xa thepi. Va nga ha yi endla leyintsongo va tiendlela vona, kambe leyi a hi yona thepi yi nga ta famba na matiko. Ku...

¹⁸ Leswi a ndzi vulavula hi swona mixo lowu hi leswi swi nga hi tisa e—e ehenhla, nakona xexo hi xona xivangelo xa kuva ndzi ya ndzi ya teka Sonto lowu wu tako wu—wu—wu va wa xikhongelo xa vavabyi. Hikuva, kusukela loko a ndzi ri ekaya, ndzi mi byerile hi swivono ni leswi swi nga humelela, na hinkwaswo, kutani ndzi swi tisa, hikokwalaho ka yini ndzi tisile swilo leswi. Nakona mixo lowu, ku swi tisa eka ku Koka ro hetelela kwaloko.

¹⁹ Sweswi nkarhi wa mina wa ku tihlanganisa na Xikwembu; nkarhi wa Xikwembu wa kuva xi vulavula na mina. Wa vona, ndzi—ndzi—ndzi nga hava na ku ncinca nyana eka vutomi lebyi

byi nga bya mina. Ku ngari tani hiloko ndzi ehleketa leswaku ndzi tsanile, kambe ndzi—ndzi lava ku titwa nyana ndzi ri ekusuhi swinene na vanhu. Wa vona?

²⁰ Vanhu lava ndzi nga ringeta ku va byela Ntiyiso lowu wa Evhangeli, nakona va Wu fularhela, va hambana na Wona va tlhela va wu hleka. Sweswi, eka mina, sweswo swi languteka swi ri nhlamba. A ndzi na mhaka, eka mina; kambe eka swilo leswi a ndzi ri eku swivulen, I Ntiyiso lowu ndzi ringetaka ku va pfuna. Kukotisa loko u ri karhi u chovha byatso, i ku, “Lahawani, hi lowu haleno, tsemekanyani! Lahawani, humani eka xinambyana xexo xo rhukubya, mi ya ekufeni! N’wina, mi ya eku loveni lahaya!” Kutani ntsena va ku hleka, va fambela ekule. Kunene, eka mina, swi tikomba tani hiloko, loko va fambela ekule, ka hari hava lexi ndzi nga xi endlaka ha swona, wa vona, leswi ndzi nga swi endlaka.

²¹ Kambe ndzi lava ku tsutsumela eribuweni sweswi ndzi ya va khongetela leswaku, “Tlhelelani endzhaku!” Wa vona, ndzi fanele ndzi va na matitwele ya lawa, wa vona, hikuva ndza switiva leswaku kuna un’wana kwalahaya loyi a nge se nghenaku. Nakona ndzi—ndzi ya eku njobeleni ku kondza... A ku, kufikela laha nhlampfi yo hetelela yi kumekaka. Ndzi lava ku swi endla sweswo.

²² Sweswi, kutani sweswi, hi ku endlela ku endla leswi, ndzi langutele swin’wana leswi nga ta humelela nhlengeletano ya xikhongelo. Swin’wana...Kutani votala va n’wina ma xi tsundzuka xivono xa—xa ku Koka ro hetelela, ku Koka kwaloko ka Vunharhu, kumbexani. Ma swi tsundzuka, ku na swin’wana swi nga humelela loko ku nga se fika sweswo: ndzi vonile Layiti ya leyo yi ta kutani yi ya ehansi eka ndhawu ya leyo, kutani yi ku, “Ndzi ta hlangana na wena kwalahaya.” Sweswi ndzi langutele swin’wana leswi swi nga ta humelela.

²³ Lahawani malembe lawa ya nga hundza, a switoloverkerise xisweswo eka tihlengeletano ni ku vonisisa kwaloko ku ta ndzi endla ndzi va loyi a nga tiyangiki nakona ni dedeleka. Votala va n’wina ma swi tsundzuka sweswo. Ntsena ndzi fika laha ndzi nga ta yima ndzi seketeriwa hi Jack Moore eka voko lerin’wana, na Makwerhu Brown eka lerin’wana, kutani va ndzi fimbisa ehenhla nale hansi exitarateni, ku ringana awara endzhaku ka nhlengeletano. Nakona na mina ntsena, swi humelerile, a ndzi ri eku ehleketeni hi leswaku—hi leswaku hi kwihi laha a ndzi ri kona ni leswi a swi ri eku humeleteni. Kutani, vusiku hinkwabyo ndzi pavalarile lahaya ndzi ehleketa hi swona, ndzi nga tivi kunwa na swin’wana, nakona ndzi hlamala leswaku hikokwalaho ka yini va nga amukeli Hosi Yesu.

²⁴ Swingaleswi U ndzi byerile xivono leswaku, “Nkarhi wun’wana u ta hlangana na manana loyi a nga ta ta eka wena, a ambarile suti ya buraweni, nakona u tava a tlakurile xihlangi

hi xinkumbani, nakona kusukela hi nkarhi walowo kuya emahlweni, u tava na ntamu wo tiyisela eku tiyen." Kunene, ndzi mi byerile hinkwerhu sweswo. A Chicago swi humelerile, vusiku byebyo loko manana lontsongo wa Mupresbyterian, loko mufundhisi loyi a nga wa yena a ta n'wi rhumela lahaya na n'wana.

²⁵ Nakona ndzi pfumela leswaku a kuri buti wa yena, kumbe un'wana wa vona, ari—ari dokodela. U teri, "A ka hari na ku tshembhela eka n'wana handle kaloko Xikwembu xa Matimba hinkwawo xi n'wi khumbha." U fambile . . .

²⁶ U yile a ya byela mufundhisi wa yena. Mufundhisi u teri, "A ndzi—ndzi ringanelanga," u teri, "eka—eka kuva ni ku endla eka ku hanyisa loku ka Matimba, hikuva a ndzi tivi . . . ntsena a ndzi na swona endzeni ka mina, ripfumelo leri ri lavekaka ku swi endla." Sweswi, leswaku, sweswo i ku tshembheka ha swona. Wa vona? U teri, "Ntsena a ndzi na rona eka mina." A ku, "Kambe a ndzi ri eka yin'wana ya tinhlengeletano ta Makwerhu Branham, nakona ndzi ku tsundzuxa leswaku u teka n'wana u n'wi yisa eka Makwerhu Branham." Kutani dokodela u xi tshikile, nakona a xiya ekufeni.

²⁷ Nakona manana lontsongo u fambile a ya lahaya a ndzi ri na swin'wana swa—swa nhlengeletano eka vona vana lavantsongo va Khatholiki lava a va tshwile, eka xikolo lexiya a xi ri ehenhla lahaya, ma swi tiva. Ma swi tsundzuka leswaku a swi ri njhani. A hi ri na nhlengeletano yaleyo, kutani lahawani ehansi eka platifomo ku ta manana ya loye lontsongo a ambarile suti ya buraweni. Nsati wa mina na vona a va tshamile kwalahaya, hiloko ndzi ku . . . ndzi hundzuluka ndzi languta, ndzi languta hinkwako, ni vona loko va yimile kwalahaya. Nakona swi humelerisa xisweswo, sweswo swi humelele loko ntsena ndzi nga seta, ndzi pfumela leswaku Billy Paul na vona a va ri ekuvulavuleni, kumbe nsati kumbe van'wana va vona, na manana loyi a ri na xihlangi. Kutani manana a ta eka platifomo, nakona Moya lowo Kwetsima wu paluxa hinkwaswo, kutani wu horisa n'wana kwalahaya.

²⁸ Ndzi fambile ndzi suka, kutani kusukela nkarhi wa luwa a ndza ha karhali. Wa vona, a swa ha ndzi karhati, nakona ntsena ndzi—ndzi ya emahlweni na le mahlweni.

²⁹ Sweswi ndzi langutele swin'wana leswi swi nga ta humelela, nakona ku sungula ku Koka kwaloko ka Vunharhu eka maraka. Wa vona? Nakona leswaku Sonto lowu wu taka na mixo eka xikhongelo xo horisa vavabyi, kumbexani xi nga ha swi tswala sweswo. A ndzi tivi.

³⁰ Ndzi ehleketa, hi hina leswi hi nga swi endlaka, i ku byela n'wina vanhu, leswaku mi kuma vanhu lava va vabyaka. Sweswi, eka xikhongelo xo horisa vavabyi, hi fanele ku tinyiketela eka vanhu lava va vabyaka. Mi kuma vanhu va

n'wina lava va vabyaka, kutani mi va tisa lahwani ka hari mixo wa Sonta, ndzi nga ha ku kwalomu ka nhungu kumbe hafu ku bile awara ya nhungu, nakona hi tava pfumelela va va nyika makhadi ya xikhongelo loko va ha nghena hi nyangwa, hambi hilaha va nga ta swi endlisa xiswona. Kutani hi tava na layini ya xikhongelo kutani hi khongeleta vavabyi, nakona ntsena hi vona leswaku Moya lowo Kwetsima wu ta endla yini.

³¹ Ndzi pfumela leswaku Xa ha ta endla swihlamariso loko ntsena hi nga Xi pfumela, wa vona. Kambe hi fanele ku Xi pfumela ka hari sweswi, hi timbilu ta hina hinkwato. Nakona ndzi ehleketa leswaku awara leyikulu yi fikile laha Xikwembu, tani hi vunyngi tani hilaha a hi ri eku vulavuleni mixo lowu, xi tikombiseke swinene, nakona xi hi tisa kun'wana...ntsena ku fika endhawini. Ntsena ku susumetela eka xiganga lexiya, nakona sweswo hi swona hinkwaswo hi swi lavaka, kutani swi fambela ekule. Wa vona, swi—swi famba tani hilaha a swi ri hakona, swo fana, na moya wo hlahuva, swo fana hi vuprofeta, ku ta swi hlalela.

³² A ndzi yimile eCalgary...Ndzi khomeleni, a ri ri hosikazi ra doroba, ehansi a Regina, Regina. Nakona Ern Baxter a yimile kwalahaya, na ntawa wa hina. Nakona Hosi yi ndzi byerile, kona kwalahawani eka platifomo, "Swi ta humelela, u ta tiva swihundla swa timbilu ta vona." Nakona sweswo hi swona. Nakona a ndzi nga swi ehleketa hi maendlelo ya lawa. Ndzi yi le eka platifomo vusiku byebyo, na Ern, kutani ntsena hiloko ndzi sungula ku khongeleta vavabyi. Kutani lahwani ku ta wanuna, ntsena a humesele ehandle vutomi bya yena bya khale; ro sungula swi humelerise xisweswo, hi xinkadyana, eka xikhongelo xo hanyisa vavabyi. Hiloko ndzi languta eka vayingiseri, nakona hi Leri ri sungulaka ku ta eka vayingiseri na swin'wana. Oho, loko hi fika eka tlhelo lerin'wana! Leri ra hafu a ri nga se byeriwa, hi swilo, ku huma va ya ehandle va ya vona swilo eka vutomi bya vanhu. A ndzi vuli nchumu ha swona. Ntsena ndzo swi tshika swi ri swoxe, wa vona, handle kaloko ndzi sindzisiwa ku vula swin'wana.

³³ Kutani sweswi ndzi langutele leswi swi landzelaka ku ta sungurisa xisweswo. Wa vona, Xikwembu, hi ndlela leyi yi nga ya Xona N'winyi, hi nkarhi lowu wu nga wa Xona N'winyi wa vutifumi, ku swi sungula. Nakona swi—swi tava swi ri swilo swin'wana leswi swi nga ta—ta va swi ri endzhaku ka van'wana na van'wana va vanhu lava. Wa vona? Nakona ndzi langutela sweswo leswaku swi humelela.

³⁴ Kutani kumbexani, oho, ndzi ehleketa, loko ndzi ngava na xikhongelo nyana xo horisa vavabyi kumbexani Sonto lowu wu taka. Kutani Sonto lowu swi nga endleka ndzi kumeka ndzi fambile na vona, hikuva va fanele ku tlheleta endzhaku va taya exikolweni. Kutani hi Sonto lowu wu landzelaka, ndzi, hikuva,

ndzi le Chicago, eka nhlengetano leyi yi nga kwalahaya. Kutani ndzi tlhela ndzi vuya hi Musumbunuku lowu wu taka, ndzi ta famba hi Wavumbirhi ku—ku ya eArizona, leswaku vana va kota ku tlhelela exikolweni.

³⁵ Kunene, xana u kume yini, mufundhisi? [Makwerhu Neville a ku, “Kunene, ndzi kume swin’wana swo chavisa swinene.”—Muhleri.] Swikahle, sweswo swi kahle, sweswi hi lava ku swi twa.

³⁶ Swingaleswi ho—ho Hosi a yi mikatekisi hinkwerhu, hakunene, ka kahle hakunene. Nakona ndzi—ndzi tshembha leswaku ndzi ta mi vona lahawani Sonto lowu wu taka. Na vusiku bya Wavunharhu...

³⁷ Kutani yingiselani. Mi nga tirivali tikereke leti letintsongo, kukotisa ya Makwerhu Ruddell, Makwerhu Jackson, Makwerhu Parnell, ni hinkwavo vamakwerhu lava lavantsongo lava tikarhataka hi ku tika ehandle lahaya, wa vona. Nakona va titwisa xisweswo leswaku hi va—va—va kereke ya sesi wa vona lahawani, ma swi vona. Hi hi muxaka wo kotisa xintlawani nyana xa va manana wa vona. Kwalaho hilaha va nga tswaleriwa kona, va huma kwalahawani, vafundhisi ni kuya emahlwени.

³⁸ Na nakulorhi lontsongo loyi a nga endzhaku lahawani, buti, ndzi hlanganile na yena vusiku byin’wana kwalahaya, Allen, Makwerhu Allen lontsongo. Ndzi tshembha leswaku Makwerhu Collins lahawani u ta kumeka na Makwerhu Allen, loko a nga n’wi tivi. Havumbirhi bya vona i tiministara ta Methodist, nakona va—va vone Ntysiwa wa Rito.

³⁹ Laha, nhla—nhla nhlangano wa kereke ya Methodist, laha wu nga ntlawa wa kahle wa vanhu eka kereke yaleyo ya Methodist. U nga ehleketai leswaku a va tano. Va tano. I ntlawa wa kahle wa vanhu eka kereke ya leyo ya Khatholiki. I ntlawa wa kahle eka kereke ya Presbyterian. Na tindhawu leti hinkwato lahaya, i vavanuna ni vavasati lava va nga langutela ku vona Layiti ya leyo yi vangama endleleni ya vona. Ntsena tshamani mi ri karhi mi vangamisa Layiti, hi vumunhu, mi olova. Hinkwerhu a hi kuleni hi tshunelela Xikwembu, hikuva hi titsongahata. Wa vona?

⁴⁰ Mi nga rivali, tabernakele leyi yi ta lahlekeriwa hi matimba ya yona. Tsundzukani leswaku laha hilaha Sathani a nga kongomisa kona a nga na swibamu hinkwaswo a tiheleni leswi swi nga leteriwela yona. U ta endla leswaku munhu un’we a endla swin’wana leswi swi hambanaka ni leswi un’wana a swi ehleketa. U le ku swi endleni sweswo. U le henhla ka swona. Rero i bindzu ra yena, loko a nga kuma un’wana leswaku a vula swin’wana, un’wana leswaku a vulavula hi un’wana, a ku, “Kunene, yingisela, xana wa

switiva leswaku *Swingere-ngere* u endle yini?" Mi nga swi yingiseli. Mi nga swi yingiseli, eka hinkwaswo. Sweswo i javulosi. Wa vona, i Sathani. Mi nga swi pfumeli.

⁴¹ Loko kuri na swin'wana leswi un'wana a nga swi endla hi ku hoxeka, va khongeeleni. Nakona u nga khongeli hi ndlela leyi yi nga ya wena u ri wexe, i ku, "Ndza switiva leswaku i ntirho wa mina, ndzi fanele ku khongeela makwerhu ya loye." U swi teka swi va embilwini ya wena, swi va ehansi hakunene, eka sesi ya loye. Nakona u vulavula u tlhela u olova hakunene, nakona nchumu wo sungula u wu tivaka, u tava kuma va tlhelerile exikhongelweni nakambe. Wa vona? Hikuva, endzhaku ka hinkwaswo, hi kongomanile na le ku peleni ka dyambu.

⁴² Hosi Yesu u ta vuya eka rin'wana ra masiku lawa. Kutani, ma swi tiva, ndzi ehleketa leswaku swi tava swa xitshuketa ni ku—ku olova swinene, nakona ku tava na dzana rin'we ra tiphe-...dzana rin'we ra tiphesente ta dzana rin'we ta misava hinkwayo a va nge switivi hambi kuri ku switiva leswaku Ntlhandluko wu teke ndhawu. Wu ta humelela ku lo tititi laha ku nga ta pfumaleka na un'we wo swi tiva. Wa vona?

⁴³ Nakona ku tava, hakunene, xintlawani xi ta ku, "Kunene, sweswi, *Swingere-ngere*?"

⁴⁴ "Oho, va ri kuna ntlawa wa vabayizani lahaya, a ku ntlawa lowu wu nga sala kwalahaya, nakona vona....Sweswo a swi tano. Ntsena va ye ehandle kun'wana. Hi vile na vona vabayizani valava, wa vona."

⁴⁵ "Kunene, va ta ku eka xitabernakelani xexo, xi nga endhawini leyi yi vitaniwaka Jeffersonville, kuna swirho swo tala swa vona leswi nga lahleka."

⁴⁶ Wa vona, ntsena va ta tlanga hi sweswo. Va ta ku, "Oho, a ku na nchumu eka sweswo, ma swi vona," tani hi sweswo, nakona Yi ta hundza nakona a ve nge switivi.

⁴⁷ Ku rhendzeleka hi tiko, ku ta ta, vona lava va nga fela eka Kreste va ta rhanga va pfuka. Ku Tlhandluka ku ta teka ndhawu, Kereke yi ta yisiwa eKaya. Kutani Mahlomulo ma ta nghena, nakona, oho, mina, a hi swilavi ku ta lahawani hi nkarhi walowo. A ndzi swilavi kuva lahawani eka Mahlomulo. Ee. Xikwembu a xi swi sivel i sweswo leswaku un'wana wa hina a ngavi a ri kona lahawani hi nkarhi walowo. Hikuva, "loyi a thyakeke a vi loyi a thyakeke; loyi a kwetsimaka a vi loyi a kwetsimaka; loyi a lulameke a engeti a va loyi a lulameke." A kuna....Xinyimpfana xi tile na Buku ya Xona yo Kutsula, nakona Mutekiwa u humesiwile. Lava va nga Ri tekela ehansi va taya eka nkarhi wa Mahlomulo, havumbirhi Muyuda na Wamatiko. Wu tava wu ri nkarhi wihi wa Mahlomulo! A ndzi swilavi sweswo.

⁴⁸ "Hosi, ndzi kwetsimisi sweswi." Yaleylo i dyondzo ya Nazarene ya kahle, a hi yona xana? [Makwerhu Neville a ku,

“Amen.”—Muhleri.] Nakona i ntiyiso, na swona. I ntiyiso. Hi swona sweswo. “Ndzi tati sweswi hi Moya lowo Kwetsima wa Wena sweswi, Hosi. Humesa hinkwayo misava yi suka eka mina sweswi, Hosi. U nga—u nga hi pfumeleli hi va na . . .”

⁴⁹ Tani hilaha makwerhu wa mukhaladi a nge teri, “Nkulukumba, ndzi na thikithi ra mina evokweni ra mina. Khale ri phanchiwile. Loko ndzi fika ehansi enambyeni, mixo walowo, a ndzi lavi khombo kwalaho.”

⁵⁰ Swingaleswi, swi nga hava swi ri kahle, a ndzi—ndzi lavi khombo. Khomelela thikithi evokweni ra wena, hikuva hi ya emahlweni. Ntsena ehleketa ha swona, nkarhi lowukulu wa ku kutsuriwa wu fikile.

⁵¹ Kutani sweswi nchumu wun’wana. Makwerhu, xana hi rihi vito ra yena, ehenhla lahwani eUtica? Ndzi ehleketa leswaku i Makwerhu Graham, na makwerhu un’wana kwalahaya loyi a nga mufundhisi kwalahaya. Makwerhu Shanks kumbe swin’wana swo kotisa sweswo, kumbe Sink? [Makwerhu Neville a ku, “Makwerhu Snelling.”—Muhleri.] Makwerhu Snelling i mufundhisi, hinkwavo ka vona. Makwerhu Snelling i mufundhisi ehenhla eUtica sweswi. Ndzi ehleketa leswaku nhlengeletano ya vona ya xikhongelo yi sungula hi . . . [“Vusiku bya Wavumune.”] Vusiku bya Wavumune. Sweswi, ma swi tiva, swi nga va swi sasekile ngopfu loko hi nga rhetemukela kwalahaya hi Wavumune na madyambu hi ya kombisa vanakulorhi lava xinakulobye xintsongo. Wa vona? Kutani loko Makwerhu Jackson, minkarhi leyi a ri na ya yena, loko hi nga kuma xintlawani nyana xa hina hi famba kun’we.

⁵² Ntsena yanani emahlweni niku khongela, mi ya emahlweni niku cela! Ina, mi nga yimi. Ntsena tani hilaha Eliya a nga va byela, a ku, “Celani magoji lahaya!”

Loko mi ya mi ya ehansi, mi ba thini ra khale, mi ku, “Ndzi karhele ngopfu”? Ri cukumeteni mi ri susa endleleni mi ya emahlweni niku cela. Wa vona? Ntsena yanani emahlweni niku cela, hikuva hi fanele ku cela. Ntsena hi fanele ku cela, hi swona hinkwaswo sweswo. Hikuva, loko u—loko u langutela ku hupa Mahlomulo, swa antswa u sungula ku cela.

⁵³ Sweswi, hi yumina, ndza tichumayeleta lahaya. Ndzi ya ekusunguleni ku cela ko enta kuthula hilaha ndzi nga tshama ndzi cela. Hikuva, ndzi titwisa xisweswo, etikweni naku rhendzeleka hi misava, laha ministri lowu wu nga ta vuyeriwa, tani hilaha wu tivekaka sweswi hinkwako emisaveni. Ndzi—ndzi boheka ku tlhelela nakambe.

⁵⁴ Wansati u teri eka mina . . . Mixo wun’wana, ndzi ku, “Ndzi lava ku famba na wena loko u suka lahwani. Ndzi ta suka hikwalomu ka Sunguti, loko Hosi yi swi rhandza. Ndzi lava ku teka ku endzela loku ku nga hetiseka ka misava, ku

rhendzeleka hinkwako; ndzi tlhela ndzi vuya kumbexani ndzi tava na tinhlengeletano eUnited States, nkarhi wun'wana hi ximumu lexi xi landzelaka."

Hiloko a ku, "Ndzi khegurile loko swi ta eka ku famba."

⁵⁵ "Kunene," ndzi ku, "Ndzi fambile loko ndzi... kwalomu ka rendzo ra mina ro hetelela endzhandzheni, kwalomu ka nhungu wa malembe lawa ya nga hundza, nakona ndzi titwa tani hiloko ndzi ri eka xivumbeko xo antswa kutlula loko ndzi ri na nhungu wa malembe lawa ya nga hundza, ma swi tiva. Wa vona? Ndzi tiva swo hlaya ha rona sweswi."

⁵⁶ Nakona hi kumeka eka nhloko-mhaka, "Loko Hosi yi teri, 'Ndzi ta ku longoloxela makume mbirhi-ntlhanu wa malembe. A wu ngeyi u ya kuma mitshekheto. U ta swikota ku famba, nakona ndzi ta ku longoloxela makume mbirhi-ntlhanu wa malembe u ri emisaveni,' u nga ha ma teka kusuka—kusuka eka ku tswariwa ku ya eka makume mbirhi-ntlhanu, kumbe kusuka eka makume mbirhi-ntlhanu kuya eka makume ntlhanu, makume ntlhanu kuya eka makume nkombo-ntlhanu, kumbe makume nkombo-ntlhanu kuya eka dzana?"

⁵⁷ Sweswi, munhu un'wana na un'wana loyi a nga longoloxeriwela nkarhi wun'wana laha misaveni, hakunene u tava a ri nchumu wa magugu loko a nga tirhisi nkarhi walowo eka tihlengeletano ta Xikwembu. A ndzi na mhaka ni leswaku u endla yini.

⁵⁸ Sweswi, loko hi leswaku u tava muhandzuri wa timbilu eka vavasati, ni kuya emahlweni, swa antswa u teka xiyimo xexo xa vuntshwa, eka makume mbirhi-ntlhanu ya lawa yo sungula. Wa vona?

⁵⁹ Loko hi leswaku u tava muvatli, makhanikhi, kumbe swin'wana, swa antswa u teka makume mbirhi-ntlhanu ra vumbirhi. Wa vona?

⁶⁰ Kutani a ndzi ri eku ehleketeni hi leswaku, "Mina ke? Xana ndzi nga pambula kwihi?" Ndzi nga ha pambula makume nkombo-ntlhanu kuya eka dzana. Ndzi tava wa malwandla, wa vutlharhi. A ndzi tava ndzi tshamisekile swinene. A ndzi nga ta ha tiva ngopfu hi leswi ndzi swi endlaka. Ndzi na khume, nhungu kumbe khume, wa malembe kutlula nkarhi lowu wu nga hundza loko ndzi ri endzhandzheni wa malwandle. Ndzi ngaka ndzi nga ha tluli ndzi nghena kukotisa loko ndzi dlaya tinyoka. Ndzi ngaka ndzi nga ha tivi nchumu ha swona, wa vona. Ndza switiva leswaku njhani.

⁶¹ Kova ntsena mbyana ya ximakwa yi lwaka na mbyana ya ximakwa kuloni, wa vona. Wa switiva leswaku u nga wu khomisa ku yini. U nga tluleli endzeni lahaya; a ku n'waya. Wa vona, tiva mano ya yena u languta leswi a swi endlaka. Nakona hi dyondzo ngopfu hi nala. Swingaleswi hi fanele ku

kuma hinkwabyo vutlhарhi bya yena, ni hilaha a tshunelelaka hakona, ni leswi a swi endlaka, niku dyondza swibakele swa yena, swingaleswi u leteriwile ku nghena eka yena, wa vona.

⁶² “Swingaleswi ndza pfumela sweswi,” ndzi byerile nsati, “Ndzi pfumela leswaku ndzi le ka xivumbeko xo antswa sweswi kutlula hilaha a ndzi ri hakona makume mune wa malembe hi vukhale, ni kuya emahlweni.” Wa vona, nakona ndzi na makume ntlhanu-mune. Nakona ndza pfumela, loko ndzi nga hanya ndzi nga ha va ekusuhi tani hilaha ndzi swikotaka sweswi, loko ndzi ri na dzana, loko ndzi nga . . . loko Yesu a nga hwlwela nkarhi walowo wo leha, ndzi nga hava eka xiyimo xo antswa kutlula leswi ndzi nga xiswona sweswi, ku famba. Wa vona? Hikuva, u tiva swinene ha swona, u tiva swo tala hi leswi u nga swi endlaka, ni hilaha u nga swi khomisaka xiswona, leswaku xiyimo xi khomisiwa ku yini.

⁶³ Swi teka vanhu vohlaya sweswi, loko hi leswaku va ya eku endlifiensi ka vuhandzuri. “Va ku dokodela lontshwa wa ha ku thwassa ntsena siku rin’wana, nakona ntsena u ta a huma exikolweni xa vutshunguri. A nga se tshama a endla vuhandzuri. Mi nge yena a byi endla.”

⁶⁴ “Oho, ee,” mi nga ha ku, “a nga endli nchumu. Ku ngari munhu ya loye. Ee, nkulukumba. Hambi swi ri tano, ee, hakunene. A ndzi n’wi lavi leswaku a vekela mukwana wa yena eka mina. Kunene, swi nga antswa ndzi rhelela ehansi lahwani ndzi ya kuma *Swingere-ngere*. Ndzi twa leswaku u vile na vuhandzuri byo tala. Wa switiva leswaku byi endlisiwa ku yini.” Sweswo hi swona, wa vona. Yaleylo i miehleketo yo antswa.

⁶⁵ U ehleketa ha leswi, kambe moyo walowo wona ke? Ndzi lava un’wana loyi a switivaka leswaku va le kwihi, niku tiva patu; loyi a fambaka hi rona. Ina, hakunene.

⁶⁶ Hosi a yi mi katekisi. Hi swona, Makwerhu Neville, tana haleno sweswi. Nakona Xikwembu a xi katekisi Makwerhu Neville. Mi nga rivali sweswi, Sonto lowu wu taka.

⁶⁷ [Makwerhu Neville a vulavula hi Makwerhu Branham na Makwerhu Vayle xinkadyana, kutani a ku, “Ndzi khensa ku amukela tiministara ta Xikwembu, ngopfu-ngopfu lava va nga na ntirhisano na Leswi, nakona Ri na hina hinkwerhu. Ndzi khensa ku twa hi vona.”—Muhleri.] Amen. [“Swingaleswi ndzi kombela Doctor Lee Vayle, ndzi ri, ‘Xana u nga chumayela loko Makwerhu Branham a hluleka xana?’ Nakona Makwerhu Branham a nge swikoti. Swi nga ha endleka a switivile leswi.”]

Ee, a ndzi switivanga. A ndzi tava ndzi nga vulavulanga hi ku lehisa kwaloko.

⁶⁸ [Makwerhu Neville a ku, “Swingaleswi ndzi kombela Makwerhu Vayle, vusiku lebyi, loko a nga hi chumayilela, loko Makwerhu Branham hi leswaku a nge swikoti. Hikuva

u tihlanganisile na yena eka tihlengeletano, nakona wa yi tiva Ndlela, Ndlela ley. Nakona hi ta tsaka kuva hi va na Makwerhu Vayle. Ndza n'wi amukela ni ku n'wi xixima tani hiloko ndzi swi endla nale ka van'wana tiministara, nakona tani hiloko ndzi swi endlela van'wana. Kutani swingaleswi loko a nga ta vusiku lebyi a ta vulavula na hina, ndzi ta khensa ngopfu loko a ta a ta hi endlela swona.”—Muhleri.] Amen. [“Xikwembu a xi ku katekisi, nakona a hi khongeeleni Makwerhu Vayle. Van'wana va n'wina a mi se tshama mi n'wi twa, nakona ndza tshembha leswaku mi ta n'wi khongeleta.”] Ina.

⁶⁹ Ndzi ngaka ndzi nga ha wu teki nkarhi lowu hinkwawo. Ndzi kombela ku khomeriwa eka vayingiseri. A ndzi nga switivanga, a ndzi tshamile lahay, leswaku u...leswi swi lulamisiwile. Xikwembu a xi ku katekisi, Makwerhu Vayle.

⁷⁰ [Makwerhu Lee Vayle a ku, “A ku nga lulamisiwanga. A ku, loko u ‘nga vulavuli.’ Nakona u tile.” Makwerhu Branham na nhlengeletano va hleka—Muhleri.] Swi kahle. Swi kahle sweswo.

⁷¹ Ndzi fanele ku n'wi yingisela, hi vumina. Makwerhu Vayle u vulavule minkarhi yo tala emahlweni ka mina, eka tihlengeletano, ni—ni kuya emahlweni. U kote ku khoma tihlengeletano nkarhi wo leha, nakona i makwerhu wa kahle, u endlile ntirho lowu wu nga kukumuka. Nakona ndzi na ntiyiso wa leswaku vayingiseri lava va tshama va tsakile ku twa Makwerhu Vayle loko a vulavula. Hosi a yi katekisi Makwerhu Vayle.

⁷² [Makwerhu Vayle a vulavula makume nkombo wa timinetse hi Marka 16:15-20 na Matsalwa man'wana, lawa ya nga nhlokohatiwa leswaku: *Hikokualaho Ka Yini Marka 16 Yi Nga Tirhang'a? Nakona Njhani, Kuya Hi Matsalwa, Ku Maendla Leswaku Yi Tirha*—Muhleri.]

⁷³ Swi tele leswi swi nga vuriwa kufikela laha ndzi—ndzi—ndzi nga taka ndzi nga vuli nchumu ku ma antswisa. Nakona ndza pfumela hi ntiyiso leswaku i Hosi ley iyi nga swi tirha leswi eka Makwerhu Vayle leswaku a tisa hungu leri, endzhaku ka mixo lowu. Hikuva, ma swi vona, swi fanele ku tirha hi ndlela ya leyo. Ha—ha swi amukela sweswo kusuka eka Xikwembu. Yini, ku na swo tala leswi a ri eku swivuleni; ndzi—ndzi—ndzi na minchumayelo ya makume mbirhi ndzi nga yi tsala ehansi lahawani, ley iyi humaka eka leswi a nga swivula.

⁷⁴ A ndzi ri karhi ndzi ehleketa lahawani hi xikombiso xin'we lexintsongo, ku ta seketela leswi a ri eku swivuleni. Sweswi, hi languta eka wachi ley, ku vona leswaku i nkarhi muni. Handle kaloko xitirhisawa xin'wana na xin'wana eka wachi ya leyo yi na ku tirhisana, xin'wana eka xin'wana, a hi nga ta tiva nkarhi wa ntiyiso. A hi swona xana? [Nhlengeletano yi ku, “Amen.”—Muhleri.] Nakona sweswo swi teka hinkwerhu

ka hina, hinkwerhu kun'we, loko hi lava ku vona ku Koka ka Vunharhu ku endlela Xikwembu swin'wana hakunene, i ku tihlanganisa na un'wana na un'wana wa hina kun'we, leswaku hi titsongahata emahlweni ka Xikwembu ni kuva hi tivula ku hoxisa ka hina, hi khongela niku pfumela eka Xikwembu eka swilo leswi.

⁷⁵ Hi ntiyiso ndza pfumela leswaku leswi a swi vula hi Makwerhu Vayle i Ntiyiso, leswaku Xikwembu xi ngaka xi nga vekeli Moya wa Xona eka leyi yi nga kwetsimiki, leyi nga lulamangiki, tempele leyi yi nga yingisiki. Ee. Wu fanele ku ta hi—hi ndlela ya ku basisiwa ka timbilu ta hina eka swisandzu hinkwaswo na vubihi, leswaku hi nga ha va lava va tengke emahlweni ka Xikwembu, leswaku Xi nga ha tirha hi Moya wa Xona lowo Kwetsima lowo tenga eka hina, ku tisa swilo leswaku swi humelela. Ndzi—ndzi ehleketa sweswo, loko mi ya ekaya vusiku lebyi, loko mi nga hlaya Buku ya leyo leyintsongo ya Yuda, ntsena mi ta dyondza hinkwaswo swo tala sweswi swa leswi Makwerhu Vayle a nga swivila. Kutani u teri, “Ndzi tiyisisa ku tikarhatela ka Ripfumelo leri ri nga tshama ri tisiwa eka vawkwetsimi.” Va fambele ekule na Rona. Hilaha vanhu va miehleketo leyi yi onhekeke, ni kuya emahlweni, va nga nghena va ta va xisa va fambela ekule kusuka—kusuka eka swilo swa ntiyiso wa Xikwembu.

⁷⁶ Nakona Xikwembu xi nga tirha ntsena loko hi Xi pfumelela xi tirha. Nakona ku na swilo swo tala swo saseka, leswi ndzi nga eku swivilueni...

⁷⁷ Ma swi tiva, vanhu va lava matimba, nakona hakunene a va switivi leswaku matimba i yini. Wa vona, a va—a va switivi leswaku hakunene ma famba na—na—na yini. Swa—swa le henhla va swi yisa ehansi, minkarhi hinkwayo. Loko u lava matimba, vona leswaku hi ku titsongahata u nga ma kuma njhani. Ntsena fambela ekule niku ehleketa ka wena ka misava, kutani u titsongahata emahlweni ka Xikwembu, kutani u tava na matimba krtlula munhu loyi a tsutsumaka na muako a endla huwa leyikulu; wa vona, hikuva u swi kotile ku tihlula wena hi wexe, nakona u tiboha eka Kreste, ma swi vona, leswaku mi titsongahata emahlweni ka Xona. Yalawa hi wona matimba hakunene.

⁷⁸ Mi ndzi komba kereke leyi yi titsongahata, leyi yi titsongahata hakunene, ku ngari—ri leyi yi tiarisaka; kereke, leyi yi olovaka hakunene, kereke yo titsongahata, ndzi ta mikomba kereke leyi yi nga na ku rhandziwa na matimba ya Xikwembu eka yona. Hi swona sweswo. Walowo i nchumu lowu yi wu khomaka, vumunhu, hi titsongahata emahlweni ka Xikwembu, hi pfumelela Xikwembu leswaku xitirha ha hina. A hi fanelanga hi endla huwa leyikulu.

⁷⁹ Minkarhi yin'wana, tani hilaha n'wa-mapurasi a ngeteri, u yile ensin'wini hi golonyi ya yena, nakona, minkarhi hinkwayo loko a ba bambara, a yi ta gudlagudla yi ya emahlweni. Kambe loko a vuya, a tlhela a ba bambara ya liya a ya ha gudlagudli na huwa a ya hari kona, hikuva yi layichile swilo swa kahle.

⁸⁰ Swingaleswi ntsena ndzi ehleketa leswaku swi kahle, wa vona, leswaku hi kumeka hi tatiwile hi swilo swa kahle swa Xikwembu, leswaku muhandzu wa Moya wu nga ha tiveka ha hina. Tani hilaha a nga kongomisa ngopfu eka Vakorinto vo Sungula 13 lahaya, ni hilaha, leswaku, "Hambi ndzi nga nyikela miri wa mina leswaku wu hisiwa, ni kuva na hinkwaswo swilo leswi, kutani ni ngari na rirhandzu; a swi nchumu, a swi ndzi vuyerisi nchumu." Wa vona, hi lava ku swi endla sweswo.

⁸¹ Ehenhleni ka swilo hinkwaswo, i mimoya ya hina wa un'we un'we leyi hi nga na vutihlamuleri emahlweni ka Xikwembu. Wa vona, hi-hi *wena* u yaka eTilweni. A swi yi hi ku hambi *na* ya, kumbe *yena* wa ya. Hi *wena* u yaka, wa vona, kutani wena kusungula. Nakona u ta fanela ku languta leswi nakona u ta hi ku titsongahata eka Hosi.

⁸² Nakona minkarhi hinkwayo ndzi kuma leswaku munhu loyi a titsongahataka i munhu loyi Xikwembu xi n'wi tlakusaka. Loko u teka munhu loyi a nga humesela swifuva ehandle a tivaka swilo hinkwaswo, nakona u nga n'wi byeli nchumu, nakona a ri loyi a nga twisisiki, kutani—kutani, kunene, yaloye—yaloye i munhu loyi a nga yiki helo. Kambe loko u teka munhu loyi va titsongahataka va tlhela va famba hi ku titsongahata.

⁸³ A ndzi ri eku vulavuleni na munhu un'wana siku rin'wana, loyi ntsena a ri eku kondleteleni ka kereke a... a humeke eka nhlangano lowu a va ri eka wona lahaya. Kutani, kunene, i Makwerhu Boze, na kereke ya vona leyi va nga na yona, a vari na kereke ya leyo leyikulu kwalahaya nkarhi wo leha, nakona Hosi a yi ri eku katekiseni. Kutani vanhu va kumekile endhawini laha a va lava ku tipholicha hinkwavo ka vona, nakona va lavile ku tihoa eka nhlangano. Kutani loko va swi endlile, ntsena yi... Vakreste lava vo titsongahata kwalahaya a va nga swilavi sweswo. Vutomi bya vona hinkwabyo, va dyondzisiwe kulwisana na wona, swingaleswi hiloko va hambana na wona. Sweswi va na ntlawa, nakona Hosi yi va katekisile ku fikelah laha va nghenaka, va le ka ndhawu leyikulu sweswi nakambe, eka kereke leyi yi nghenisaka kwalomu ka mune kumbe ntlhanu ma magidi wa vanhu, nakona va le kusunguleni nakambe.

⁸⁴ Nakona va tile eka mina, va ku, "Makwerhu Branham," loko ndzi tshamile lahaya a hofisini, hofisi ya kereke, siku rin'wana. Kutani u teri, un'wana wa varhangeri, Makwerhu Carlson na vona, va ku, "Xana hi boheka ku endla yini?"

⁸⁵ Ndzi ku, "Kumani munhu loyi a nga tava murisi loyi a nga riki na ndhuma eka tidinominexini hinkwato, loyi ntsena a nga kahle hakunene, wa xiviri, wo olova, makwerhu wo titsongahata loyi a hanyaka vutomi. Xikwembu xi ta hlayisa leswin'wana hinkwaswo, wa vona." Ndzi ku, "Mufundhisi wa kahle loyi ntsena a nga ta phamela tinyimpfu, nakona a titsongahata na swin'wana, Xikwembu xi ta endla leswin'wana. Loko ntsena mi nga... Ku ngari un'wana lonkulu wo tiva hinkwaswo a nghena, a ya a ya veka *leswi* hi ndlela leyinene, nakona leswi swi fanele kuva hi ndlela *leyi*, niku tsemelela swilo hinkwako." Ndzi ri, "Swi ngaka swi nga tirhi. Ntsena wo fanelu ku swi endla."

⁸⁶ Hi swona sweswo, xiphemu xin'wana na xin'wana ekerekeli swi boheka ku tirha kun'we, nakona u boheka ku hlayisa xiphemu xa xona. Swingaleswi ha wu vona nkarhi lowu hi hanyaka eka wona. Hi nga hava hi ri ekusuhi kutlula hilaha hi ehleketa ha kona.

⁸⁷ Sweswi, ha n'wi amukela Makwerhu Vayle. A hi tano xana? [Nhlengeletano yi ku, "Amen."—Muhleri.] Hosi a yi ku katekisi, Makwerhu Vayle. Ndza ku khensa. Nakona hi khensa Hosi kuva yi tisile hungu leri lerikulu eka hina madyambu lawa.

⁸⁸ Nakona ndzi kumile xipapilani, eka timinetse tintsongo leti ti nga hundza. Un'wana wa vasesi u na swin'wana a lavaka ku swivula, swa nhorho. Loko u nga ndzi tsalela wona, sesi, ndzi—ndzi... U n'wi nyikile milorho yin'wana leyi a yi hetisekile yi va ntiyiso. A hi amukeli milorho hinkwayo. Ee, ee. Kambe loko yi ri ya Xikwembu, hi lava ku switiva loko kuri Xikwembu xi vulavulaka na hina.

⁸⁹ Kukotisa loko hinkwaswo swi vulavula hi tindzimi, a hi swi pfumeli; kambe loko kuri na ku hlamusela ku taka ku ta hi byela swin'wana leswi swi yaka eku humeleleni, ha swi vona swi humelela, kutani hi khensa Hosi ha swona. Wa vona?

⁹⁰ Hi yi lava yi famba khwatsi, hi ku olova, nakona hi ku lerisa ka Hosi. Swingaleswi ntsena tsundzukani, xexo i xiphemu xa wena kumbexani i xipiringi lexikulu, kumbe xi nga hava lexintsongo, voko nyana lerintsongo, kumbe xiphemu nyana lexintsongo, kumbe xinsinyana lexi xi wayindhelaka, kumbe leswi swi ngavaka xiswona, kumbe ri nga hava mavoko exikandzeni xa wachi, leyi yi vulaka nkarhi. Kambe leswi yi nga vaka xiswona, wu hi teka hinkwerhu hi tirha kun'we hi ntwanano na Evhangeli ya Yesu Kreste, ku tisa leswi leswaku swi hetiseka.

⁹¹ Ntsena ehleketa! Loko tinyiko ti ri letikulu swinene, leswi hi swi vulaka matimba; nakona Paul u teri, "Hambi loko ndzi ri na ripfumelo leri ndzi nga susaka ntshava, kutani ndzi ri hava rirhandzu, a ndzi nchumu." Ehleketa hi sweswo.

⁹² Hambi hi ngaku, “Kunene, hambi ndzi—ndzi twisisa... Ndzi navela loko a ndzi tiva Bibebe.”

⁹³ “Hambi ndzi nga twisisa swihundla swa hinkwaswo swa Xikwembu, wa vona, hambi loko ndzi nga swi endla nakona ndzi ngari na rirhandzu, a ndzo va nchumu. Wa vona, a kuna laha ndzi yaka kona.” Wa vona, nchumu lowukulu i ku, rhandza Xikwembu, u tlhela u titsongahata ha swona.

⁹⁴ Sweswi, hakunene, endzhaku ka malembe lawa hinkwawo ndzi ri asin’wini ni ku rhendzeleka hi misava, niku vona vanhu vo hambana, ndzi fanele ku tiva swintsongo hi nyangwa wo nghena ha wona. Nakona loko u lava kuya kun’wana na Xikwembu, u nga pfumeleli moyo wo tiarisa wu ta eka wena. U nga pfumeleli lunya ri nghena. A swi na mhaka ni leswaku un’wana u endla yini, loko va hoxile, u nga kali u tiakela khumbhi ro lwisana na munhu ya loye. Wa vona? U olova u va na tintswalo. Tsundzukani, Xikwembu xa mi rhandza loko mi ri evudyohweni. Nakona loko Moya wa Xikwembu wu ri eka n’wina, mi rhandza munhu un’wana loko a hoxile. Wa vona, ntsena va khongeeleni, mi tlhela mi rhandzana.

⁹⁵ Ehenhla ka hinkwaswo, rhandza Xikwembu u tlhela u rhandza un’wana. Nakona mi titsongahata na Xikwembu na un’wana, kutani Xikwembu xi ta mi katekisa, nakona swa tika ku vula leswi Xi nga ta swi endla. Hi ntolovelokoreke yi sungula ku va na nhlayo yi kumeka yi ya yi kula, kumbe swin’wana swo kotisa sweswo, kutani va fambela ekule eka nchumu walowo wa nkoka, nchumu wa nkoka.

⁹⁶ Ma swi tiva leswi swi tiseke swilo leswi leswaku swi humelela, loko ndzi tava ndzi sungurile nakona Hosi yi humelela eka mina ehansi enambyeni yi ta ndzi byela sweswo? Nakona Makwerhu Vayle u swi vonile sweswo, ndza pfumela, ephepheni a Canada, malembe yo tala lawa ya nga hundza, laha Ntsumi ya leyo ya Hosi yi nga humelela enambyeni ehansi lahaya, a swi ri eka Associated Press, “Layiti ya Xihundla ehenhla ka muministara wa lokhali, loko a ri eku khuvuleni.” Nakona—nakona ma swi tiva leswaku ku humelela yini kwalaho? Loko hi ri na nhlengeletano ya tende ntsena ku tsemekanya xitarata, tende leri ri tshamisaka kwalomu ka, oho, makume mbirhi ntlhanu wa vanhu, tiministara ti ta ti huma hinkwako, va ku, “Makwerhu, tana nyana swintsongo.” A ndza hari jaha, nyana, oho, ntsena kuva n’wana. Kutani va teri, “U va endla njhani vanhu lava leswaku va va vari hi moyo wun’we xana? Va rhandzana... A ndzi nge se tshama ndzi vona vanhu va rhandzana.”

⁹⁷ Ya leyo i Hosi. Sweswo hi leswi kereke leyi yi nga sunguriwa ehenhleni ka swona, byebyo i vukhongeri,

rirhandzu ra vumakwerhu eka un'wana. Ndza va vona hambi kuri ku tlhavulana mavoko na van'wana, va sukela ndhawu, kutani va rila kukotisa vana, loko va siya un'wana. Va rhandzana eka vukahle byebyo. Nakona ndzi nga ha ya etindlwini ta vona ndzi ya va muendzi, mi nkarhi yin'wana Bibele yi va yi pfuriwile yi ri na mathonsi ya mihloti. Ndzi nghena, hi minkarhi ya na vusiku, laha vatatana na vamanana va nga hlengelletana kun'we, na swivanani swa vona swi ri ehansi, swi ri karhi swi khizama khizama hinkwako; na vatatana na vamanana va ri ematsolweni ya vona, va ri eku rileni niku khongela. Ndzi ta yima enyangweni ndzi rindzela naku rindzela naku rindzela. Nakona a va yimi ku khongela, ntsena ndzi ta kala ndzi tshama a switepisini ndzi sungula ku khongela, hi vumina, ndzi rindzela vona, wa vona. Nakona sweswo—sweswo a swi ri tano. Nakona va rhandzana. Va rhandzana. Hi tolovele ku yima hi yimbelela risimu lero ra khale:

Ku katekile xibohi lexi xibohaka
 Timbilu ta hina erirhandzwini ra Xikreste;
 Xinakulobye xa miehleketo ya vamakwavo
 Xi kotisa lexi xi nga eHenhla.

Loko hi handzuriwa,
 Xi hi nyika xithlavi lexi xi yaka emahlweni;
 Kambe hi ta tama ha ha khomanile
 atimbilwini,
 Ni ku tshembha leswaku hi ta tlhela hi
 hlangana nakambe.

⁹⁸ Ndzi vula leswi hi ntsako lowukulu lowu wu nga embilwini ya mina, eka Kreste. Votala va vona va etlela eka masirha lawa ya nga lahwani ya nga funghiwa vusiku lebyi, va rindzerile ku pfuxiwa kwaloko lokukulu ka vafi laha hi nga ta hlangana nakambe.

⁹⁹ Mi nga wu pfumeleli moyo walowo wu suka eka ndhawu ley! Loko swi nga tshuka swi endlekile, kutani a ndzi na mhaka na mufundhisi wa n'wina a nga va a sindzisa ku fika kwihi, u kahle ku fika kwihi leswaku a nga ha tisa Rito ra Xikwembu, Moya wa Xikwembu wu khomiwile hi tingana wu famba. Wa vona? Loko hi ngava na swilo hinkwaswo eka xinakulobye, kun'we, ni kuva hi rhandzana, kutani Xikwembu xi ta tirha na hina.

¹⁰⁰ Nakona hi hlayisa nkarhi, leswaku vanhu va nga ha tshunela va ta ku, "Loko u lava ku vona kereke leyi yi titsongahataka hakunene, kereke leyi hi ntiyiso yi rhandzaka Xikwembu, nghena eka tabernakele liya nkarhi wun'wana u ya va hlalela. U languta leswaku va hlayisana njhani, ku xiximana; loko Evhangeli yi tava yi chumayeriowile, hilaha va nga na xichavo hakona, hilaha hinkwaswo swi

nga tshamiseka." Ina, kutani va nga ha langutisa va vona leswaku hi hanya eka nkarhi wihi. Mi ta vona Moya wa Xikwembu wu famba-famba exikarhi ka n'wina, masingita lamakulu na swihlamariso na swin'wana swi tava swi ri karhi swi humelela. Loko hi leswaku nchumu wu tirha kun'we, wu le ku vuleni ka nkarhi. Kambe loko yi ngari eku tirheni, swingaleswi nkarhi wu yimile, yi ngaka yi nga ha vuli nkarhi nakambe. Swingaleswi loko hi lava ku tiva leswaku i nkarhi munhu lowu hi hanyaka eka wona, ntsena un'wana na un'wana ntsena a sungula ku tirha kun'we na Evhangeli, mi ri karhi mi rhandzana, mi rhandza Xikwembu, na mavoko hi woxe ma ta vula nkarhi lowu hi hanyaka eka wona. Ma swi pfumela sweswo xana? [Nhlengelatano yi ku, "Amen."—Muhleri.] Hakunene. Amen. Hosi a yi mikatekisi, hi rifu lerikulu.

¹⁰¹ Mi nga rivali sweswi, kumekani vhiki leri. Nakona loko mi tiva swa kahle, vanhu lava va vabyaka lava va ngabenaka, va byeleni, loko va nghena, va ku, "Murhandziwa, ndzi lava ku ku vutisa. Hi na xikhongelo xa vavabyi, hi Sonto na mixo, etabernakeleni. Nakona a wu vabya swa xinkadyana, sweswi ndzi lava . . ."

"Kunene, ndzi lava ku famba. Minkarhi hinkwayo ndzi va ndzi lava ku famba."

¹⁰² "Sweswi, ntsena ndzi twile hungu hi Sonto na vusiku, ri huma eka makwerhu loyi a nga lahaya, hilaha hi fanelaka ku tivula eka swihoxo swa hina hi byelana, hi tlhela hi khongerisana, leswaku hi ta hanyisiwa. Yakob 5:14, 13, 14, 15, wa vona, leswaku hi tivula milandzu ya hina hi byelana hi nga si ta eka ku horisiwa. Ina. Hi tivula milandzu ya hina hi byelana, hi tlhela hi khongeletana." Wa vona? Wa vona, sweswo hi swona hakunene leswi a vulavula hi swona vusiku lebyi, ku vuyelerisela mikateko hi Marka 16. Swiboheni kun'we sweswo, mi na swona, kutani ku hanyisiwa ku teka ndhawu.

¹⁰³ Langutani Yesu, a kuri hava nchumu handle ka xijumba xa rirhandzu. Wa vona? A ri Xikwembu lexi xi tivonakariseke. Xona, Xikwembu, xi ti hlamusela xona N'winyi ha Yena, a swihlamarisi loko swihlamariso na masingita swi humelerile. Vutomi bya Yena byo titsongahata, niku nyikela vutomi; leswaku a ta eka kuva Xikwembu, leswaku a tava munhu lahawani emisaveni, ku ta hlamusela Xikwembu ha yena hi Yexe. Sweswo hi leswi swi nga N'wi endla leswi A ngava xiswona. Minkarhi yo tala ndzi vula leswaku, "Leswi swi nga endla Yesu a va Xikwembu, eka mina, i ndlela leyi A titsongahatisa xiswona yena hi Yexe. A ri lonkulu, hambi swi ri tano a nga ha tlhela a va lontsongo." Wa vona? Hi swona sweswo.

¹⁰⁴ Hosi a yi mikatekisi swa kahle hakunene. Sweswi a hi yimeni, leswaku hi tshuxiwa. Ntsena a hi ringeten sweswo, (swi nga ha endleka u nga switivi, sesi), leswaku, *Ku Kaketile Xibohi Lexi Xi Bohaka*. A hi ri yimbeleleni nakambe, u ta ri kota? Hi sumeli hi khodo.

Ku katekile xibohi lexi xi bohaka
Timbilu ta hina erirhandzwini ra *Xikwembu*;
Xinakulobye xa miehleketo
Xi kotisa lexi xi nga eHenhla.

¹⁰⁵ Sweswi loko ha ha yimbelela vthese yo hetelela, a hi khomaneni hi mavoko, “*loko hi handzuriwa*,” kutani ntsena hi ku, “*Xikwembu a xi ku katekisi, buti, sesi*. Ndzi tsakile kuva na wena vusiku lebyi.” Wa vona, swin’wana swokotissa sweswo, kutani hundzulukani. Sweswi a hi ri yimbeleleni.

Loko hi handzuriwa . . .

Xikwembu a xi ku katekisi, Makwerhu Neville!

Swi hi nyika xitlhavi lexi xi yaka emahlweni;
Kambe hi ta tama ha ha khomanile a
timbilwini,
Ni ku tshembha leswaku hi ta tlhela hi
hlangana nakambe.

¹⁰⁶ Hilaha hi nwi rhandzisaka xiswona Hosi Yesu! A hi tano xana? [Nhlengeletano yi ku, “Amen.”—Muhleri.] Njhani . . .

Ku kondza hi hlangana!
Ku kondza hi hlangana eminkondzweni ya
Yesu; (ku kondza hi hlangana!)
Ku kondza hi hlangana! ku kondza hi
hlangana!
Xikwembu a xive na n’wina ku kondza hi
hlangana nakambe!

A hi pfaleni mahlo ya hina, kutani hi ri yimbelela rero hi ri emoyeni sweswi.

Ku kondza hi hlangana! ku kondza hi
hlangana!
Ku kondza hi hlangana aminkondzweni ya
Yesu;
Ku kondza hi hlangana! ku kondza hi
hlangana!
Xikwembu a xive na n’wina ku kondza hi
hlangana nakambe!

¹⁰⁷ Sweswi loko tinhloko ta hina ta ha korhamile. Ho va ntsena vana, vana va Xikwembu. A hi ri hameni. [Makwerhu Branham a sungula ku hama, *Xikwembu A Xi Ve Na*

N'wina—Muhleri.] Oho, hi laha ri hi tisaka hakona Moya wa Xikwembu! Mi nga ha swianakanya eka masiku ya khale loko va ta tshama aswilebeni swa maribye?

Xikwembu a xi ve na n'wina ku kondza hi
hlangana nakambe!

¹⁰⁸ Loko ha ha korhamisa tinhloko ta hina, ndzi ta kombela loko Makwerhu Allen endzhaku lahaya, makwerhu lontshwa exikarhini ka hina, loko a nga hi ntshuxa hi rito ra xikhongelo. Makwerhu Allen.



TITSONGAHATI TSO63-0714E
(Humble Thyself)

Hungu leri hi Makwerhu William Marrion Branham, ri sungurile ri hangalasiwa hi Xinghezi hi Sonto ni madyambu, Mawuwani 14, 1963, eBranham Tabernacle eJeffersonville, Indiana, U.S.A., ri tekiwile kusuka eka nkandziyiso wa thepi ya maginetiki kutani yi tsariwa yi nga khomananga hi Xinghezi. Hundzuluxo lowu wa Xitsonga wu tsariwile wu hangalasiwa hi Voice Of God Recordings.

TSONGA

©2015 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Xitiviso Xa Mpumelelo Wo Kopa

Timfanelo hinkwato ti hlayisiwile. Buku leyi yi nga ha kandziyisiwa hi printara yale kaya leswaku munhu a ti tirhisela kumbe ku yi phakela, yi nga hakerisiwi, tani hi xitirhi xo hangalasa Evhangeli ya Yesu Kreste. Buku leyi a yi xavisiwi, yi humesiwa hi xikalo lexikulu, yi vekeriwa eka “website,” yi hlayisiwa eka tisisiteme leti ti nga swi kotaka kuva yi tekiwa, yi hundzuluxeriwa eka tindzimi tin’wana, kumbe yi tirhiseriwela eka nkwama lowu wu nga pfumeleriwa handle ka nhlamuselo leyi yi nga tsariwa ya ku pfumeleriwa hi Voice Of God Recordings®.

Vuxokoxoko byo tala kumbe nhundzu yin’wana leyi yi nga kona, mi komberiwa ku ti hlanganisa na:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org